

Vahong - HESMUS

san kònòntònnan — nimòrò 105  
nowanburu kalo — san 1980  
  
bp:24 - bamakò (mali)  
telefòn : 22104 — ccp : 0155  
dòròmè 4

kibarudilalaw kuntigi : amadu ganyi kantè

# Kibaru

a bè bò kalo o kalo, faso ka kibarudiso ka yamaruya kònò

## romu nyögònye "c.i.l.s.s" kan

Kibaru N° 96, 97, ani 98 kònò, sèbèn dò bòra "cilss" kan, n'a tògò ye ko "cilss" ye mun ye ?". Sèbèn in kònò, an kumana Sahelijamanaw ka gèlèyaw kan.

Gèlèya kelen in n'a digilen bè jamanaw la, hali bi, o bè ka juguya ka taa fè.


O kòsòm, san 1980, òkutòburu kalo tile 14, dèmèbagaw dinyè fan bée kònò, olu y'u ka nyögònye 10 nan kè Romu, n'o ye Itali duguba ye. Zenerali Musa Tarawele, Mali Peresidan, n'ale de fana bè "cilss" peresidanya la sisam, o taara sahelijamanaw ka gèlèya kofò nyögònye kènè in kan. A y'a jira ko sahelijamanaw mago bè balotoni 890.000 de la nyinan.



### Lakòlita

San 1980, òkutòburu kalo la kalanso fòlò lakòlisow dayèlèla Mali kònò. Nka nyinan lakòlita ni san tèmènnèn w ta mè kè kelen ye. Dòw donna; dòw ma don; i n'a fò kalansobaw.

A jirala k'a fò ko lakòlidew bè jigìn midi; u tè baara kè wula fè. O kàra yèlèma dò kòsòm: baara waati yèlèmara mali bée kònò nyinan, baarada bée la; bololabaa ra fana donna lakòliw la. Denmisènniaw bë se fana ka farikolo nyènajèw kè wula fè. O tèmènnèn kò, karamdgòw bë se k'u ka kalan kète labèr konyu-nan.



### selenge

sahelijamanaw dèmèbagaw ka kan k'a dòn ko:  
"yanni ka jègè di tuma bë kòngòtò ma, a dege jègè mònni na—"

walasa ka ja n'a nò fè ma-sibaw kèle, nyò dili t'a nyè; fo dèmè ka don jamana ninw nà walasa u ka se ka nafa sòrô bajì anì dugukolo jukòrò ji de la.

n'o kàra, san nana o, gènè bë kè, san mana o, sènè bë kè. o kama malidenw bë jigi ye selenge ye.

# kibaru kanubagaw kuma yòrò

## faantankè

ala kira tun bè taa a ka taama na.  
faantankè dò y'a ye, a ko ala kira  
ma ko :

- ala kira, i bè taa min ?

ala kira y'a kan to faantankè in  
ma, a ko :

- n bè taa kalo saba taama na.

faantankè ko ale bè taa ni ala ki-  
ra ye a ka taama na. ala kira ko a  
ka na.

ala kira ye nbuuru kala saba can,  
k'o don minèn kònò, ko :

- an ka taa.

u ye file kè taama na, kòngò ye u  
minè, minnògò ye u minè, fo ka u  
sègèn. u taaa se dugu dò la, ala  
kira ko faantankè ma, a ko :

- minèn jìgin, an ka dumuni kè.

faantankè ye minèn jìgin, u ye  
nbuuru kala kelen bò, k'a cèci, ka  
cèci kelen dun, ka cèci kelen bila  
minèn kònò, ka taama daminè.

u taatò, faantankè ye nbuuru cèci  
kelen bò minèn kònò, k'o dun ala  
kira kò fè. u taaa se dugu dò wèrè  
ma, a ko faantankè ma :

- i jìgin yan. an ye nbuuru kun kari  
min bila minèn kònò, an k'o dun.

faantankè ye doni jìgin. ala kira  
ko :

- kòr'i ma nbuuru kun kari dun dè ?

faantankè in y'a fò ala kira ma :

- a bè ne ni ala cè, ne ma nbuuru  
kun kari dun.

o y'a kè ten, ka a kè ten, fo u  
taatò, u taaa se kungoba dò la, u  
sigira jiriba dò kòrò, a suma ka di,  
u sigira o jiri in suma na. sogo dò  
nana jò u kòrò. sogoba min nana jò  
u kòrò, o y'a sòrò, sogo tobilen b'a  
la, jiranlen bè a la. ala kira ko  
faantankè ma ko :

- n'i bè ala dòn, k'a kira dòn, i bè  
nbuuru kala ninnu yòrò fò n ye.

a ye ala kira sòsò ko ale m'a dun.

u wulila, ka taa se sanu tonba dò  
ma. ala kira ko :

- n'a y'a sòrò, i bè ka nbuuru dun,  
i ka o fò n ye. ala min ye nin bila  
an nyè, i bè o ala kelen filè k'o fò.

faantankè ko ale ma nbuuru dun.

ala kira ko :

- an bè sanu tila tila yòrò saba ye.  
ala kira ye sanu tila tila yòrò sa-  
ba ye. faantankè in ko :

- ala kira, i bè sanu tila tila yòrò

saba ye wa ? n ko : an mògò fila  
don.

ala kira ko :

- ne b'a tila tila yòrò saba ye. ne  
yèrè bè tila kelen ta. e min ye  
faantan ye, e bè tila kelen ta. ani  
min ye nbuuru dun, o ta ye tila ke-  
len ye.

faantankè in ko ala kira ma :

- ne de ye nbuuru dun.

ala kira y'a fò faantankè ma :

- i bè sanu nin bée cè. bawo, ne  
y'a dòn, e tè alijènè sòrò.

Yusufu Sangare  
Jònògò

## daga ni kolon

daga ni kolon tun bè baro la. ko-  
lon ye i kan to daga ma ko :

- daga, i tè malo, i tè saamè ? baa-  
ra min bè ne bolo ka dut igi dèmè, o  
nyògòn tè e bolo. bawo, musokòrò-  
ba, muso walannin, npogotiginin,  
mògò caman, o bè kolonkala ta, ka  
tilen ka ne kònò susu. wa, jama  
donw ta ka jugu don bée ye. yala,  
e daga y'a mèn mògò jumèn da, ko  
"bi, kolon ma sòn", wali ko "kolon  
kasira bi" ? o tuma na, daga, i kè-  
lèkè nyògòn nyini. ne kolon su ka  
fisa ni e daga nyènama ye.

daga fana ko :

- kolon, tu mòrò. kolon, ne daga  
tè e filè fosi ye. ne daga sigilen fi-  
lè, kamiyòn falen dògò la, o bée  
bè taa don tasuma la ne daga kòrò.  
wa, e kolon, hali ni mògò min ye  
dògò bolo kelenpe tasuma don e kò-  
rò, i ta bè tinyè.

kolon fana ko :

- daga, ni mògò min fana ye kolon-  
kala nyè kelen kè i cè sisán, i ta  
bè tinyè.

o tuma na, kolon ni daga bè jama-  
nyinika, u fila la, dutigya bè di-  
jumèn kelen ma o ka munyu kosòn  
ani cèsiri kosòn ?

Mama Tarawele  
Samakelen

## kuma kòròma

balimamuso saba, u bée bée fa ke-  
len na, u bée bée ba kelen na. nka,  
u saba bée bée cè kelen kun. u saba  
bée fana furuli bënnen b'a. ye ala  
ka sira la, ani mògò ka sira la.

mògò bè dubabu k'a ye, ala ka  
furu ni si bën. ala yèrè bè dubabu  
k'a ye.

o ye balimamuso jumèn wye ?  
Sunnèlè Jara  
Kènènkun

nègè fa tògò ye di ? nègè ba tògò  
ye di ?

Bakaramògò Ture  
Kènènkun

# mariyanmadi sisoko:

## lawale

### samori

**samori** wolola *sanankòrò*, *manden* kònò. a tun n'a fa bë taa dògò jòw la nyògòn fè.

**wasolon** faama **sori birama** tun y'a ba minè jònýa na. samori taara a yèrè di jòn ye sori birama ma, wañasa a ba ka labila. san wolonwula o kò, samori tun nyògòn cè farin tè sori birama ka kèle-denw na.

Samori seginnen sanankòrò, a y'a yèrè kè faama ye. samori ye **wasolon** ni **manden** mara. a ka kèle-denw tun ye sofaw ye. a ye **bisandugu** kè galodugu ye.

a ye **tubabuw** kèle **kita** ani **kajolo**. tubabuw kèle ka **bamakò** minè, samori y'a dògòkè **fabu** ci ka taa **sibi** minè. a ka kèle-bolo dò taara **bèlèdugu**. tuba-

buw tè **wòyòwayankò** kèle lakali : o ma diya u la, tubabuw bolila.

Samori ye jeliba numan fè bolo to tubabuw bolo, k'i nyèsin kòròn ma. nka, a ma se **sikaso** n'a ka tataba la. sikaso tata tun lamini bë kilomètèrè segin bò, a bonya bë mètèrè wòorò bò. nin kogoba in de tuñ kèle bë ka dugu lamini. sikaso kèle cèw tun ye mógo baa tan ni fila ye, cè baa fila ni kémè duuru bë so kan. migu ni marifa caman tun bë sikaso faama bolo, numuw tun bë marifaw dilan ani nègèdenw. samori dèsera sikaso la. nka, **kalowa** kèle ni **famara** kèle ma diya sikasokaw la.

Samori denkè **karamògò** taara tubabuw bolo **faransi**. o ma dan sòrò tubabuw ka fanga na. karamògò seginnen kà bò faransi, o ko a fa ma k'u tè se


tubabuw la. o kuma fòlen kèra karamògò faga kun ye.

Samori taara sigi **dabakala**, o ni **tukòròla** ka surun. tubabuw tun ye kénýèka bëe minè. samori ye **kòn** ci fajiri fè. o fajiri kelen ma seli kòn dugu. kònò, samori ye tubabuw ka kèle-bolo dò si bàn **buna**.

**babènba** de tun bë fanga na sikaso o waati. ale y'a nyini, a ni samori ka fara nyògòn kan ka tubabuw kèle. o taara ka dan kè. samori minèna tubabuw fè san 1898, **galamu**. u taara n'a ye fo **ga-bòn**. a banna yen san 1900.

Samori kaburu tun bë gabòn. **laginè** jamana hòrònyanen, u y'a kaburu lana **kònakiri**. samori dalen bë kònakiri bi.

Samori móden ye **seku ture** ye. ale de ye laginè nyémògò ye bi.



Samori ka jamana maralen fòlò tun ye **wasolon** ye : laginè kòrònyanfan, mali worodugu, ani konowari kénýèka.

Samori ka jamana maralen bë fòlò ni worodugu cè, ani kòròn : konowari kénýèka, otivalita tilebin, gana tilebin.

# ka bò kucala

ji

a fòra kibaru niñòrò 94 na ko kòorisènè baarada nyèmògòw bè ka mògò dòw dege dògòtòròya kè cogo la. o dògòtòròya kalan bè daminè ni min ye, o ye ji ko ye. bawo, ji ye fèn min ye, nafa b'a la, kara fana b'a kò. o ji ko kalan mana ban, sèbèn bè di kalandenw ma, min b'u hakili jakabò o kalan yòrò girinmanw kan. o sèbèn kònò kumaw filè nin ye :

## nafa jumèn bè ji la ?

### farisogo kònò

ji ye nyènamaya taalan ye. ji bè joli la, a bè dajì la, a bè su-gunè na, a bè wòsiji la.

mògò fari fan bée ye ji ye. ni mògò min girinya ye kilo 72 nyò-gòn bò, i b'a sòrò, kilo 50 ye ji ye.

baga min bè mògò fari la, o ba-ga bè bò ji fè, n'i bè wòsi, wa-lima n'i bè nyègènè kè.

### minni siratigè la

mògò ka kan ka ji litiri 2 wali 3 min don o don. o ji bè sòrò ni-mafènw na, a bè sòrò dumunifènw na, i n'a fò, jiridenw, nakòfènw.

jiminbaliya bè se ka mògò faga, k'a da farisogo jintanya kan.


### farisogo kan

mògò bè nyòn i fogonfogon fè, nka, i bè nyòn wolo fana fè. wo misèn minnu bè wolo kan, wòsiji ni fari nògò bè bò olu fè. ni nò-gò cayara farisogo la, o wo mi-sènw bè geren. o bè wo bali ka nyòn.

banda caman bè sòrò bolo nògò-lén fè. nyè jalani dimi bè lase mògò ma, n'i bè to k'i nyè dimi-tò cònkò.

### du saniya siratigè la

mògò mago bè kè ji la ka tobili kè, ka du kònò fènw saniya, ka sènè fènw ni baganw balo, ka so-jò.




ji ye nyènamaya taalan ye

jiminbaliya bè se ka mògò faga, k'a da farisogo jintanya kan.



mògò bè nyòn i fogonfogon fè, nka, i bè nyòn wolo fana fè.



nyè jalani dimi bè lase mògò ma, n'i bè to k'i nyè dimi-tò cònkò.

**nyèci****kara jumèn bè ji kò ?**

ni ji ye nyènamaya sun ye, a bè  
se ka kè saya sun ye.

banakisèw bè sòrò ji nògòw la, o





ye dala kònò jiw ni kò kònò jiw ye.  
kòlonda nògòlenw ji fana man nyi.

banakisè minnu bè ji nògò la, olu  
sigilen bè tuma bée ni mògò kélèli

ye.

ji la banaw ka ca. a dama dòw  
filè nin ye : sen sa bana, segelen,  
nkoroshyèn, kònòboli.

**jiminta bè sòrò cogo di ?**

**sanji**

cencen

bogopasa

simon

jipoyita  
min bè se ka min

ji min tè minta ye

ji minta cogoyaw

ji minta nyè bè yeleyele, kasa  
t'a la, diya ni goya t'a la, awa,  
a sumalen don.

n'i b'a fè k'a dòn nin ji masina  
ye ji minta ye, wali minta tè, a  
nyini, i k'a sintin dòn.

- ni ji poyita don :

a ka c'a la, o bè se ka min. ni  
kulù la ji bè poyi, a saniyalen  
don. bawo, a bè dugu jukòrò ji  
dunman na. o sènsènen don cèn-  
cèn nyè misèn fè. o ji bè se ka  
min, n'a y'a sòrò, a ma lanogò,  
a bòtò.

- ni kòlòn na ji don :

o bè se ka min, n'a y'a sòrò,  
kòlòn ka dun, ani n'a labènnen  
konyuman.

- ni barigon na ji don :

ni ji mèenna o kònò, o man kan  
ka min. barigon kònò ka kan ka  
mu pentiri la fòlò. a kònò ji ka  
kan ka yèlèma dògòkun o dògò-  
kun. tèmè misèn ka nyi barigon  
da la.

- ni worobinè ji don :

a ka c'a la, o ji bè se ka min.  
bawo, a sènsènen don, k'a sani-  
ya, ji ko baarada mògòw fè.  
(a tò bè bò kibaru nata kònò)

barigon datugulen ka to, yaasa ji kana lanogò

kòlòn labennen konyuman

# tayiru banbera ka maana

# bitòn kulibali

a ko : e ye ne yèrè den ye.  
 a ko : na an ka jè ka fara nyògòn kan,  
 an ka nyò tigè.  
 a sòròla ka laban ka fa terikè in dèmè,  
 a nò ye dògòkun bò, u bè to ka nyò tigè.

nyò tigè nana ban tuma min na, a fa terikè ko a ma ko:  
 - n denkè.

a ko : - naamu.

a ko :  
 - ni kamalen kòrò ma nyè don kò kungo kònò,  
 i n'i ka daliluw de bè don kungo kònò dè.

a ko : dalilu jumèn bè e bolo ?

a ko : n'i ye donso ko mèn, i bè sa juguw ye,  
 n'i ye donso ko mèn, i bè jinè juguw ye,  
 n'i ye donso ko mèn, i bè wòkulò juguw ye,  
 o tuma na, fo a k'a sòrò, o kumbèn de b'i bolo.  
 kumbènnan bè i bolo wa ?

a ko :

- baba, i terikè taatò tun ye fèn dòw to n bolo,

a ko : olu bè n bolo.

a ko : - wa, ne yèrè ka n ta fara a kan.

Bitòn ko : - i dun bè jumèn ni jumèn fara a kan ?

a ko : - n'i ma kòròtò n ma,

a ko : nyuman sara ye nyuman ye.

i ye nyuman kè n ye.

ne tun ko e ma i k'i bisimila

ka n dèmè an ka jè ka nyò tigè.

ne ka mago dilara,

ne yèrè man kan ka n bolo kò jira i la tugun.

fa terikè sòròla ka laban, ka taa npalan kònò o la.

a ye furamugu dò bò, k'o di Bitòn ma.

a ko :

- nin min filè i bolo nin ye,  
 nin tògò de ye k'a fò ko nyamagènnan.  
 n'i donna nyama juguw cè la,  
 n'i donna boli juguw cè la,  
 n'i donna kòròte juguw cè la,  
 nin kòni, n'a b'i la ka ban,  
 ni mögò o mögò y'a ka binyè turu i la,  
 a bè gèlè jalani na.

Bitòn ko : - baasi tè, a ko : n'y'o mèn.

cèbakòrò sòròla ka laban k'o minè,

k'a bila a kun a ka npalan kònò.

a y'i dèmèdèmè o la, i n'a fò, furu jugu.

furu mana goya ka ban, a kunkan kòròfò ka ca,

nyè nyuman koli ji man ca.

n'i k'i bè nyè jugu ko, i bè si ka ji kè a kan,  
 bo tèna ban a la, sanko ka taa se nyè ka jè ma.

a sòròla ka laban, ni k'i labèn o la,  
 a nana ka na don npalanbaw la,  
 a ye npalanbaw ta, k'olu dulon a kère la,  
 a ye ku tigè muru ta, ni k'o bila a kun,  
 a ye jurukisè ta, k'o sòori npalanbaw la.  
 bamanan ka npalan ye o npalan saba ye,  
 o npalan saba bè bamanan kamalen bée bolo, ni ka yaala.

\*

\* \*

a sòròla ka laban, k'i bin ka na se...  
 dugudò bè Banin da la,  
 u k'o dugu ma k'a fò ko Kaana,  
 a nana ka na se Kaana tuma min na,  
 a fa terikè dò bè yenninnò,  
 a nana ka na jigin o fè yen Kaana.  
 a fa terikè ko a ma : - n denkè.

a ko : - naamu.

a ko a ma k' : - i bòra min, i bè taa min ?

a ko :

- ni bi tè, baba, mögò fa teri tun ye i fa dò ye,  
 mögò ba teri tun ye i bai dò ye,  
 mögò kòrò teri tun ye i kòrò dò ye.

a ko :

ne nyè yèlèla ka e ni baba to nyògòn kan balo la,  
 baba taara lahara k'e to yan,  
 ayiwa, baba sa furadama, i ma jigi tinyè.  
 n nana ka na n jigi sèmè i la,  
 ko kelen bè n na, ko min ye n kònògan.

a ko : - o dun ye mun ko ye ?

a ko : - ne ye sogo de bon surò,

a ko :

sogo ye n ka nègè doni,  
 a taara baninyan fan in fè.  
 n ye banin bée lajèrèlen yaala ka dèse,  
 sogo nòbò sen nana ka n'i yèrè sòrò Banin de la yan.  
 n b'a fè ni ka sogo in nò fè bò.  
 n y'a dòn, sogo in bè ka Baba tigè.  
 n b'a fè ka taa Segu,  
 tarisa n na se ka n ka sogo lahalaya dòn.

o y'i kan to a ma, ko :

- n denkè, o tè baasi ye, i bisimila.

a ko :

nka, ne kèlen bè ka sènè kè,  
 n ka nyò nyènen don.  
 o tuma na sa, sani i ka taa ka n to yan,  
 den tè n bolo,  
 ni bi tè, mögò terikè den, o tun y'i den dò ye,

## ka masala

o tuma na, Bitòn ko :

- ne b'a fè ka sira nyini i fè.

fa ye sira di Bitòn Kulubali maa-faa-donso ma o la.

\*

\* \*

a nana o la Sekòrò gun kan,  
a y'a sòrò, jinèw koorilen bè jinè sokala la,  
u bè ka tulon sugu bè lajèrèlen kè,  
dòw nisòngoyalen don.

Bitòn donna yòrò min na,  
jinèw y'u kan to ko bunadamaden sennin-fila dèrè.

a ko : - òwò. a ko : o don.

u ko : - e bòra mini, i bè taa mini ?

a ko : - ne de ye sogo dò bon,  
nka, sogo ye n ka nègè doni.

a y'i kunda Banin kan, n ye Banin tigè a nò fè.

a y'i kunda Baba kan,

n nalen bè Baba lajè, n'a y'a sòrò,

n ka sogo kèlèn bè ka yan ye,

walima n'a ni yankaw bè nyogòn ye.

olu k' : - o tuma na, anw yèrè koorilen bè yan,  
an bè hèrè ni bònè la.

Bitòn ko : - yala, mun si hèrè ni bònè b'aw bolo yan ?

u ko :

- mögò dò b'anw fè yan,  
kisè bilalen don a tigi la.

an ka jinè dò don.

kisè y'a minè, a sen kèlen bè joli ye,  
joli min kènya ko y'an kònògan.

an b'a fura de nyini mögò fè,  
min ye se k'a fura d'an ma.

ayiwa, Bitòn k' : - o tè baasi ye.

so kònò minèn jugu bèe n'a ta don don.

jòn maa na ye kara ye,

maa kana subaaya maakòròbaya kili.

a ko : n'i ye subaaya maakòròbaya kili,

a ko : i bè tèmè a la denmisèn dò ka npogi kan feren la.  
ne kònì nana, ne ye hadamaden ye,

aw ye jinèw ye,

an ka fòtaw tè kelen ye,

an ka mèntaw tè kelen ye,

an ka dònkok tè kelen ye.

jinèw k' : - o tuma na, tabarikala, o diyara an ye.

Bitòn ko : - ne bè n ka fura d'aw ma.

tile tan an i duuru, o ye n ka sarati ye.

aw bè tile tan an i duuru kè,

ka n ka fura in kè aw ka dimintò la.

n'a ka joli ma kènya fyewu, fo ka si falen a da la,

o tuma na, ne yèrè na laban

ka taa n baba byininka lahara.

n k'i y'a sòrò, a ye fèn min di n ma, a ye n janfa.

n'o fè, a ma a bolo kò sin n ma.

olu ko : - tabarikala, anw tun bè fèn min nyini ala fè,  
o ye o ye.

Bitòn Kulubali maa-faa-donso labanna  
ka fura di jinèw ma.

\*

\* \*

a tilenna jinèw fe yen o don tile tò.

a y'i kòsegin tuma min na, sifana dun selen,

komi donso y'a yèrè ye, donsoya ka di a ye,

komi fura in dira, a bè na i kòsegin ka taa a ba fan fè,

a nana ka na i kan to ko : i tò, n ka bi su in kè yan.

o don, nsira sunba dò jolen bè yen.

a taara ka taa taraba tigè nsira sun in ju kòrò.

taraba tigèlen nsira sun in ju kòrò tuma min na,

a y'i sigi taraba in kònò.

donsow bè sigi yen ka sogow makònò.

a sigilen tuma min na, su tè kò, su tè nyè,

jinèkè kòròbaw dò bè yen,

olu bè ka saja bila nyogòn na,

olu b'u ka nyènajè la.

cébakòrò sigilen bè tuma min na taraba kònò,

suruku kòrò nana ka n'i sigi nsira ju kòrò.

jaa, duga masa kòrò dò sigilen bè nsira bolo la.

suruku y'i kun jan,

ka duga masa kòrò sonsorolen ye nsira bolo la,

u ye nyogòn kuma bò.

a ko : - n kòrò suruku don wa ?

a ko : - ònhòn, ko : ne don.

a ko : n kòrò duga wa ?

a ko : - ònhòn.

a ko : - i dun bè mun na yan ?

a ko : - ayiwa, a ko : ne yèrè sigilen bè

ala ka sebagaya kònò yan.

a ko : - o tuma na,

e ka sanfèla kibaru nyininkali kè, duga,

ne yèrè bè dugumala kibaru nyininkali kè.

da ka surun, a finyè ka jan.

mögò o mögò manà nin yòrò in tu tigè,

ni ka i sigi yan,

i bè nin jamana in bèe lajèrèlen mara.

a fura tè mori bolo, a tè lalimu bolo,

a tè halimu kulifanè bolo.

(a tò bè bò kibaru nataw kònò)

# san 1981 jate sèbèn

## zanwuye kalo

ntènèn tarata		araba alamisa		juma		sibiri		kari	
		1	2	3	4				
5	6	7	8	9	10	11			
12	13	14	15	16	17	18			
19	20	21	22	23	24	25			
26	27	28	29	30	31				

## awirili kalo

ntènèn tarata		araba alamisa		juma		sibiri		kari	
		1	2	3	4				
6	7	8	9	10	11	12	13	14	15
13	14	15	16	17	18	19	20	21	22
20	21	22	23	24	25	26	27	28	29
27	28	29	30	31					

## feburuye kalo

ntènèn tarata		araba alamisa		juma		sibiri		kari	
		1	2	3	4				
2	3	4	5	6	7	8			
9	10	11	12	13	14	15			
16	17	18	19	20	21	22			
23	24	25	26	27	28				

## mè kalo

ntènèn tarata		araba alamisa		juma		sibiri		kari	
		1	2	3	4				
4	5	6	7	8	9	10	11	12	13
11	12	13	14	15	16	17	18	19	20
18	19	20	21	22	23	24	25	26	27
25	26	27	28	29	30				

## marisi kalo

ntènèn tarata		araba alamisa		juma		sibiri		kari	
		1	2	3	4				
2	3	4	5	6	7	8			
9	10	11	12	13	14	15			
16	17	18	19	20	21	22			
23	24	25	26	27	28	29			
30	31								

## zuwèn kalo

ntènèn tarata		araba alamisa		juma		sibiri		kari	
		1	2	3	4				
8	9	10	11	12	13	14	15	16	17
15	16	17	18	19	20	21	22	23	24
22	23	24	25	26	27	28	29	30	31

## zuluye kalo

ntènèn tarata		araba alamisa		juma		sibiri		kari	
		1	2	3	4				
6	7	8	9	10	11	12			
13	14	15	16	17	18	19			
20	21	22	23	24	25	26			
27	28	29	30	31					

## òkutòburu kalo

ntènèn tarata		araba alamisa		juma		sibiri		kari	
		1	2	3	4				
5	6	7	8	9	10	11	12	13	14
12	13	14	15	16	17	18	19	20	21
19	20	21	22	23	24	25	26	27	28
26	27	28	29	30	31				

## uti kalo

ntènèn tarata		araba alamisa		juma		sibiri		kari	
		1	2	3	4				
3	4	5	6	7	8	9			
10	11	12	13	14	15	16			
17	18	19	20	21	22	23			
24	25	26	27	28	29	30			
31									

## desanburu kalo

ntènèn tarata		araba alamisa		juma		sibiri		kari	
		1	2	3	4				
7	8	9	10	11	12	13			
14	15	16	17	18	19	20			
21	22	23	24	25	26	27			
28	29	30	31						